




**NSANGO MALAMU
OYO EUTI NA NZAMBE!**



Ndenge mwa buku oyo ekoki kosalisa yo:

Mwa buku oyo ekosalisa yo osepela koyekola Biblia, Liloba ya Nzambe. Baverse oyo ezali na nsuka ya paragrafe mokomoko ezali komonisa esika oyo okoki kotanga na Biblia biyano na mituna oyo ezali na langi ya moindo makasi.

Ntango ozali kotanga baverse yango, talá ndenge oyo ezali koyanola na mituna yango. Motatoli ya Yehova nyonso akosepela kosalisa yo okanisa na oyo baverse yango elingi mpenza kolimbola.  *Tángá Luka 24:32, 45.*

Ndenge nini okoki kozwa verse na Biblia na yo?

Liboso okomona nkomo ya **mokanda** ya Biblia oyo osengeli koluka.

Motango ya liboso ezali **mokapo**.



Tángá Yoane 17:3.

Motango to mitango oyo elandi ezali **verse** to **baverse** ya kotanga.

YOANE 16:33—17:24

bozali na bolózi, kasi bózála na mpiko! Ngai nalongi mokili.”

17 Yesu alobaki makambo wana, mpe, ntango atombolaki miso na ye na likoló, alobaki ete: “Tata, ngonga ekoki; pesá mwana na yo nke-mbo, mpo mwana na yo apesa yo nke-mbo, **2** na ndenge opesi ye bokonzi likoló ya moto nyonso ya mosuni, mpo, bango nyonso oyo opesi ye, apesa bango ~~borroi ya seko~~ **3** Oyo elakisi bo-moi ya seko, báyekola koyeba yo, Nzambe ya solo kaka moko, mpe moto oyo yo otindaki, Yesu Kristo. **4** Napesi yo nkembo na mabele, mpo nasilisi

Nsango malamumu oyo euti na Nzambe!
Good News From God!
Enyatami na 04/2018

Lingala (fg-LI)

© 2012
WATCH TOWER BIBLE AND TRACT
SOCIETY OF PENNSYLVANIA

Babimisi

Printed by Watch Tower Bible
and Tract Society of South Africa NPC
1 Robert Broom Drive East, Rangeview,
Krugersdorp, 1739, R.S.A.

Made in the Republic of South Africa
Enyatami na Afrika ya Sudi

Mokanda oyo ezali ya koteka te. Ebimisami mpo na koteya bato Biblia na mokili mobimba, mpe mbongo mpo na kosala mosala yango eutaka na makabo oyo bato bapesaka na bolongi na bango moko.

Mpo na kopesa likabo, kotá na www.jw.org.

Soki liyebisi ezali te, mikapo ya Makomami euti na
Biblia—Libongoli ya Mokili ya Sika.

Eutelo ya bafoto: Lokasa 6, likoló, Rulo ya Mbu Ekufá: Shrine of the Book, Foto © The Israel Museum, Jerusalem; lokasa 6, katikati, mpe lokasa 32, likoló na loboko ya mobali, Codex ya Greki: Foto ya Codex Alexandrinus oyo bakangaki na 1909, na ndingisa ya British Library; lokasa 16, Hitler: Euti na Foto ya U.S. National Archives

Liyebisi: Mikanda nyonso oyo batangi na mwa buku oyo ebimisami na Batatoli ya Yehova.

Nsango malamumu ezali nini?

1

1. Nsango nini euti na Nzambe?

Nzambe alingi ete bato básepela na bomoi awa na mabele. Asalaki mabele mpe biloko nyonso oyo ezali na mabele mpo alingaka bato. Mosika te, akosala likambo moko mpo bato ya mikili nyonso bázala na bomoi ya malamumu na mikolo ezali koya. Akolongola makambo oyo enyokolaka bato.  *Tángá Yirimia 29:11.*

Guvernema moko te elongi kosilisa mobulu, maladi, to liwa. Atako bongo, ezali na nsango moko ya malamumu. Mosika te, Nzambe akolongola baguvernema ya bato, mpe na esika na yango, akotya oyo ya ye moko. Bato oyo guvernema ya Nzambe ekoyangela bakozala na kimya mpe na nzoto kolongono.  *Tángá Yisaya 25:8; 33:24; Danyele 2:44.*

2. Mpo na nini bato basengeli koyoka nsango malamumu sikoyo?

Mabe ekosila kaka ntango Nzambe akolongola bato nyonso ya mabe na mabele. (Sefania 2:3) Yango ekosalema ntango nini? Liloba ya Nzambe esakolá banda kala makambo oyo ezali konyokola bato lelo oyo. Makambo mabe oyo ezali kosalema lelo emonisi ete etikali moke, Nzambe atya nsuka na mokili oyo.  *Tángá 2 Timote 3:1-5.*

3. Tosengeli kosala nini?

Tosengeli koyekola makambo ya Nzambe na nzela ya Liloba na ye, Biblia. Buku yango ezali lokola mokanda oyo tata ya bolingo akomeli biso. Ezali koyebisa biso ndenge ya kozala na bomoi ya malamumu lelo oyo mpe ndenge ya kozwa bomoi ya seko awa na mabele na mikolo ezali koya. Toboyi te, bato mosusu bakoki kosepela te ete oyekola Biblia. Kasi, lokola Nzambe alaki biso bomoi malamumu na mikolo ezali koya, tosengeli te kotike-la bato mosusu nzela bápekisa biso koyekola Biblia.

 *Tángá Masese 29:25; Emoniseli 14:6, 7.*



2

Nzambe azali nani?

1. Mpo na nini tosengeli kosambela Nzambe?

Nzambe ya solo azali Mozalisi ya biloko nyonso. Azali na ebandeli te, akozala mpe na nsuka te. (Nzembo 90:2) Nsango malamu oyo ezali na Biblia euti epai na ye. (1 Timote 1:11) Lokola Nzambe apesá biso bomoi, tosengeli kosambela kaka ye.

 *Tángá Emoniseli 4:11.*

2. Nzambe azalaka ndenge nini?

Moto ata moko te amoná Nzambe mpo azali Elimo, yango elakisi ete azali na lolenge ya bomoi oyo eleki mosika bomoi ya bikelamu oyo ezali awa na mabele. (Yoane 1:18; 4:24) Atako bongo, tokoki komona bizaleli ya Nzambe na nzela ya biloko oyo asalá. Na ndakisa, mbuma ná fololo ndenge na ndenge emonisaka ete Nzambe azali bolingo mpe azali na bwanya. Bonene ya molóngó emonisaka biso nguya na ye.  *Tángá Baroma 1:20.*

Tokoki kutu koyekola makambo mingi oyo etali bizaleli ya Nzambe ntango tozali kotánga Biblia. Na ndakisa, eyebisaka biso oyo Nzambe alingaka mpe oyo aboyaka, ndenge asalelaka bato makambo, mpe ndenge oyo ayokaka soki tosali likambo boye to boye.  *Tángá Nzembo 103:7-10.*

3. Nzambe azali na nkombo?

Yesu alobaki: “Tata na biso na likoló, *nkombo* na yo esantisa ma.” (Matai 6:9) Atako Nzambe azali na batitre mingi, azali na nkombo kaka moko. Nkombo yango ebengamaka ndenge moko te na minzoko nyonso. Na Lingala, ebengamaka mbala mingi “Yehova.” Kasi, bato mosusu babengaka yango “Yawe.”  *Tángá Nzembo 83:18.*

Babiblia mingi elongolá nkombo ya Nzambe mpe na esika na yango etyá batitre lokola Nkolo to Nzambe. Kasi, ntango Biblia ekomamaki, nkombo ya Nzambe ezalaki mbala

soki 7 000. Yesu alakisaki bato nkombo yango ntango azalaki koteya bango makamambo ya Nzambe.  *Tángá Yoane 17:26.*

4. Yehova akipaka biso?

Lokola bato mingi bazali konyokwama, yango elakisi nde ete Nzambe akipaka biso te? Bato mosusu balobaka ete Nzambe atikaka biso tónyokwama mpo ameka biso; kasi yango ezali solo te.  *Tángá Yakobo 1:13.*

Lokola tata ya bolingo, Nzambe azali koluka bolamu na biso ya seko

Nzambe apesá biso lokumu na ndenge asalá biso na bonso-mi ya kopona. Tosepelaka te na bonsomi oyo tozali na yango ya kopona kosalela ye? (Yosua 24:15) Kasi, bato mingi bapona kosalela basusu mabe, yango wana mpasi etondi na mokili. Yehova ayokaka mawa na motema ndenge amonaka kozanga bosembo ya ndenge wana.  *Tángá Ebandeli 6:5, 6.*

Yehova azali Nzambe oyo akipaka biso. Alingaka ete tósepe-la na bomoi. Mosika te, akolongola mpasi nyonso mpe bato oyo babimisaka yango. Kasi sikoyo, ezali na ntina oyo Nzambe atiki bampasi mpo na mwa ntango. Na liteya 8, tokoyeba nti-na yango.  *Tángá 2 Petro 2:9; 3:7, 13.*

5. Ndenge nini tokoki kopusana penepene na Nzambe?

Yehova azali kobenga biso tópusana penepene na ye na nze-la ya libondeli. Akipaka mokomoko na biso. (Nzembo 65:2; 145:18) Andimaka kolimbisa biso. Amonaka milende oyo tosalaka mpo na kosepelisa ye, atako na bantango mosusu tosalaka mabunga. Na yango, atako tozali bato ya kozanga kokoka, tokoki mpenza kozala na boyokani malamuna na Nzambe.  *Tángá Nzembo 103:12-14; Yakobo 4:8.*

Lokola Yehova apesá biso bomoi, tosengeli kolina ye koleka moto mosusu nyonso. (Marko 12:30) Okomonisa ete olingaka Nzambe soki oyekoli makamambo mingi oyo etali ye mpe osali makamambo oyo azali kosenga, mpe yango ekosala ete opusana lisusu penepene na ye.  *Tángá 1 Timote 2:4; 1 Yoane 5:3.*



3

Nsango malamuru euti mpenza epai ya Nzambe?

1. Biblia ezali mokanda ya nani?

Biblia ezali na nsango malamuru oyo elobi ete bato bakozala na bomoi libela awa na mabele. (Nzembo 37:29) Buku yango ezali na mikanda mikemike 66. Nzambe asalelaki mibali ya sembo soki 40 mpo bakoma yango. Moize nde akomaki mikanda mitano ya liboso, esili koleka mbula soki 3 500. Ntoma Yoane nde akomaki mokanda ya nsuka, ekoki sikoyo mbula koleka 1 900. Bakomi ya Biblia bakomaki makanisi ya nani? Nzambe ayebisaki bango makambo na nzela ya elimo santu na ye. (2 Samwele 23:2) Bakomaki makanisi ya Nzambe, kasi ya bango moko te. Boye, Biblia ezali nde mokanda ya Yehova.  *Tángá 2 Timote 3:16; 2 Petro 1:20, 21.*

2. Ndenge nini tokoki kondima ete Biblia elobaka solo?

Toyebi ete Biblia ezali mokanda ya Nzambe mpo elobela makambo oyo ekosalema mpenza mpe ndenge oyo yango ekosalema. Moto moko te akoki kosala yango. (Yosua 23:14) Kaka Nzambe Mozwi-ya-Nguya-Nyonso nde akoki koyeba mpenza makambo oyo ekoyela bato na miko-
lo ezali koya.  *Tángá Yisaya 42:9; 46:10.*

Tokolinga ete buku oyo euti epai ya Nzambe ekesena na babuku mosusu nyonso; mpe ezali bongo mpo na Biblia. Bamiliare ya Babiblia esili kokabolama na bankama ya minko. Atako bato mosusu batalelaka Biblia lokola buku moko ya kala, makambo oyo yango elobi eyokani na siansi. Lisusu, makambo oyo bato yango 40 bakomaki na Biblia ezali na boyokani.* Longola yango, oyo Biblia elobi mpo na bolingo esengeli kaka kouta epai ya Nzambe ya solo, oyo azali Nzambe ya bolingo, mpe tii lelo buku yango ezali kaka na nguya ya kobongola bato. Makambo nyonso wana ezali

* Talá mwa buku *Un livre pour tous*.



kotinda bamilio ya bato bándima ete Biblia ezali Liloba ya Nzambe. 📖 *Tángá 1 Batesaloniki 2:13.*

3. Biblia elobelaka makambo nini?

Biblia elobelaka mingi nsango malamumu oyo emonisi mokano ya Nzambe mpo na bato. Makomami elimboli ndenge oyo bato babungisaki libaku malamumu oyo bazalaki na yango ya kofanda na paradiso awa na mabele, mpe ndenge oyo nsukansuka paradiso ekozonga lisusu. 📖 *Tángá Emonise-li 21:4, 5.*

Na kati ya Liloba ya Nzambe, tozali kokuta mpe mibeko, mitinda, mpe batoli. Lisusu, Biblia ezali na bandakisa oyo emonisi ndenge oyo Nzambe asalelaka bato makambo. Bandakisa yango esalisaka biso tóyeba soki azali Nzambe ya lolenge nini. Na yango, Biblia ekoki kosalisa yo oyeba Nzambe. Emonisi mpe nini okoki kosala mpo na kokóma moninga na ye. 📖 *Tángá Nzembo 19:7, 11; Yakobo 2:23; 4:8.*

4. Ndenge nini okoki kokanga ntina ya makambo oyo ezali na Biblia?

Mwa buku oyo ekosalisa yo okanga ntina ya makambo oyo ezali na Biblia soki osaleli mayele oyo Yesu asalelaki. Yesu azalaki kotángá mokapo moko nsima ya mosusu mpe kolimbola “ntina ya Makomami.” 📖 *Tángá Luka 24:27, 45.*

Ezali na likambo moko te oyo ezali kitoko koleka nsango malamumu oyo euti epai ya Nzambe. Kasi, bato mosusu balingaka nsango yango te, bamosusu kutu bamonaka yango lokola motungisi. Kolemba nzoto te. Elikya na yo ya kozala na bomoi ya seko na mikolo ezali koya etaleli milende oyo ozali kosala mpo na koyeba Nzambe. 📖 *Tángá Yoane 17:3.*



Yesu Kristo azali nani?



1. Bomoï ya Yesu ebandaki ndenge nini?

Na kokesana na moto nyonso, Yesu azalaki na bomoi na likoló lokola ekelamu ya elimo liboso abotama awa na mabele. (Yoane 8:23) Azalaki ekelamu ya liboso ya Nzambe mpe apesaki maboko na kozalisama ya biloko mosusu nyonso. Kaka ye nde akelamaki mbala moko na Yehova mpe na ndenge yango abengami Mwana “se moko [ya Nzambe] oyo abotamaki.” (Yoane 1:14) Yesu azalaki mpe molobeli ya Nzambe, yango wana abengami “Liloba.”  *Tángá Masese 8:22, 23, 30; Bakolose 1:15, 16.*

2. Mpo na nini Yesu ayaki awa na mabele?

Nzambe atindaki mwana na ye awa na mabele na ndenge alongolaki bomoi na ye na likoló mpe akotisaki yango na libumu ya Maria, mwasi moko Moyuda oyo ayebaki naino mibali te. Na yango, tata ya Yesu azalaki moto te. (Luka 1:30-35) Yesu ayaki na mabele (1) mpo na koteya solo na ntina na Nzambe, (2) mpo na kopesa biso ndakisa mpo na ndenge ya kosala mokano ya Nzambe, ata ntango tozali na mikakatano mpe (3) mpo na kopesa bomoi na ye ya kokoka lokola “lisiko.”  *Tángá Matai 20:28.*

3. Mpo na nini tozali na mposa ya lisiko?

Lisiko ezali motuya oyo efutami mpo na kosikola moto oyo bakateli ye etumbu ya liwa. (Kobima 21:29, 30) Ntango Nzambe akelaki bato, mokano na ye ezalaki te ete bato bákóma mibange mpe bákufaka. Ndenge nini toyebi yango? Nzambe ayebisaki Adama, mobali ya liboso, ete soki asali “lisumu,” akokufa. Na yango, soki Adama asalaka lisumu te, alingaki kokufa te. (Ebandeli 2:16, 17; 5:5) Biblia elobi ete liwa “ekotaki” na mokili mpo

na Adama. Na yango, Adama atikelaki bakitani na ye nyonso lisumu mpe etumbu na yango, liwa. Tozali na mposa ya lisiko mpo elongola biso na etumbu ya liwa, oyo Adama atikelá biso.  *Tángá Baroma 5:12; 6:23.*

Bizaleli nini ya Yesu esalaki ete bato bábanga te koya epai na ye?

—MATAI 11:29;

MARKO 10:13-16.

Nani akokaki kofuta lisiko mpo na kosikola biso na liwa? Ntango tokufaka, tofutaka nyongo ya etumbu kaka ya masumu na biso moko. Moto moko te ya kozanga kokoka akoki kofuta nyongo ya masumu ya bato mosusu. 📖 *Tángá Nzembo 49:7-9.*


4. Mpo na nini Yesu akufaki?

Yesu azalaki ndenge moko na biso te, ye azalaki moto ya kokoka. Na yango, esengelaki te akufa mpo na masumu na ye, mpo asalaki ata lisumu moko te. Nzokande, Yesu akufaki mpo na masumu ya bato mosusu. Nzambe amonisaki bolingo monene oyo azali na yango mpo na bato na ndenge atindaki Mwana na ye akufa mpo na biso. Yesu mpe amonisaki bolingo mpo na biso na ndenge atosaki Tata na ye mpe apesaki bomoi na ye mpo na masumu na biso. 📖 *Tángá Yoane 3:16; Baroma 5:18, 19.*

5. Yesu azali kosala nini sikoyo?

Ntango Yesu azalaki awa na mabele, abikisaki bato ya maladi, asekwisaki bakufi, mpe abikisaki bato oyo bazalaki na likama. Na ndenge yango, amonisaki oyo akosala na mikolo ezali koya mpo na bato nyonso ya botosi. (Matai 15:30, 31; Yoane 5:28) Yesu akufaki, kasi, Nzambe azongisaki ye na bomoi lokola ekelamu ya elimo. (1 Petro 3:18) Na nsima, azelaki na loboko ya mobali ya Nzambe tii ntango Yehova apesaki ye nguya ya koyangela lokola Mokonzi na mabele mobimba. (Baebre 10:12, 13) Sikoyo, Yesu azali koyangela lokola Mokonzi na likoló, mpe awa na mabele, bayekoli na ye bazali kosakola nsango malamu na mokili mobimba. 📖 *Tángá Danye 7:13, 14; Matai 24:14.*

Mosika te, Yesu akosalela nguya na ye ya Mokonzi mpo na kosukisa mpasi nyonso mpe baoyo babimisaka mpasi yango. Bato nyonso oyo bazali komonisa kondima epai ya Yesu mpe kotosa ye bakozala na bomoi na paradiso awa na mabele. 📖 *Tángá Nzembo 37:9-11.*



Mokano ya Nzambe mpo na mabele ezali nini?



1. Mpo na nini Nzambe akelaki mabele?

Yehova apesá bato mabele. Mabele ezali mboka na biso. Na yango, baboti na biso ya liboso, Adama ná Eva, bakelamaki te mpo báfanda na líkoló. Nzambe asilaki kokela baanzelu mpo báfanda na líkoló. (Yobo 38:4, 7) Nzambe atyaki mobali ya liboso nde na paradiso moko ya kitoko, nkombo na yango elanga ya Edene. (Ebandeli 2:15-17) Yehova apesaki ye mpe bakitani na ye elikya ya kozala na bomoi oyo ezangi nsuka awa na mabele. *Tángá Nzembo 37:29; 115:16.*

Na ebandeli, kaka elanga ya Edene nde ezalaki paradiso. Mwasi ná mobali ya liboso, basengelaki kotondisa mabele na bana oyo balingaki kobota. Na nsima, basengelaki kotya mabele mobimba na nse na bango mpe kokómisa yango paradiso. (Ebandeli 1:28) Mabele ekokufa soki moke te. Ekozala ntango nyonso esika oyo bato bakofanda. *Tángá Nzembo 104:5.*

2. Mpo na nini lelo oyo mabele ezali paradiso te?

Adama ná Eva batosaki Nzambe te, yango wana Yehova abimisaki bango na elanga ya Edene. Paradiso ebungaki, mpe moto ata moko te alongi kozongisa yango. Biblia elobi boye: “Mabele epesamá na maboko ya moto mabe.”—Yobo 9:24. *Tángá Ebandeli 3:23, 24.*

Yehova abosani nde mokano na ye ya ebandeli mpo na bato? Te! Azali Mozwi-ya-Nguya-Nyonso. Akozanga te kokokisa yango. (Yisaya 45:18) Akosala ete bato bázala lisusu nde nge akanaki yango na ebandeli. *Tángá Nzembo 37:11, 34.*

3. Ndenge nini Nzambe akozongisa paradiso?

Mabele ekozonga lisusu paradiso ntango Yesu, Mokonzi oyo Nzambe atye, akoyangela. Na etumba ya Armagedone, Yesu akokamba baanzelu ya Nzambe mpo na koboma bato nyonso oyo batamelaka Nzambe. Na nsima, Yesu akotya Sa-

tana na boloko mpo na mbula 1 000. Basaleli ya Nzambe bakobika na etumba yango mpo Yesu akokamba bango mpe akobatela bango. Bakozala na bomoi ya seko na paradiso, awa na mabele.  *Tángá Emoniseli 20:1-3; 21:3, 4.*

4. Ntango nini bampasi ekosila?

Ntango nini Nzambe akolongola mabe awa na mabele? Yesu apesaki “elembo” oyo ekomonisa ete nsuka ekómi pene. Makambo oyo ezali koleka lelo na mokili ezali kobangisa mpe ezali komonisa ete tokómi na “bosukisi ya makambo ya ntango oyo.”  *Tángá Matai 24:3, 7-14, 21, 22.*

Kuna na likoló, ntango Yesu akoyangela na boumeli ya mbula 1 000, akosilisa bampasi nyonso awa na mabele. (Yisaya 9:6, 7; 11:9) Longola kozala Mokonzi, Yesu akosala lolola Nganga-nzambe Monene mpe akolongola masumu ya baoyo nyonso balingaka Nzambe. Na yango, na nzela ya Yesu, Nzambe akolongola maladi, bobange mpe liwa.  *Tángá Yisaya 25:8; 33:24.*

5. Nani akofanda na paradiso?

Bato oyo batosaka Nzambe bakofanda na paradiso. (1 Yoane 2:17) Yesu atindaki bayekoli na ye báluka bato ya komikitisa mpe báteya bango nini bakoki kosala mpo Nzambe andima bango. Lelo oyo, Yehova azali kopesa bamilio ya bato formasyo mpo na kofanda na paradiso awa na mabele. (Sefania 2:3) Na Bandako ya Bokonzi ya Batatoli ya Yehova, bato bayekolaka kozala mibali mpe batata ya malamumu, mpe kozala basi mpe bamama ya malamumu. Bana ná baboti basambelaka esika moko mpe bayekolaka ndenge ya kozwela nsango malamumu matomba.  *Tángá Mika 4:1-4.*



Na Ndako ya Bokonzi, okokutana na bato oyo balingaka Nzambe mpe balukaka koyeba ndenge nini bakoki kosepelisa ye



Eliya nini ezali mpo na bato oyo bakufá?



1. Nsango nini ya malamumu ezali mpo na bato oyo bakufá?

Ntango Yesu akómaki na Betani, pene na Yerusaleme, moninga na ye Lazare akufaki esilaki koleka mikolo minei. Yesu akendaki na lilita, elongo na Marta mpe Maria, bandeko ya Lazare. Eumelaki te, ebele ya bato bayaki wana. Kanisá esengo oyo Marta ná Maria bazalaki na yango ntango Yesu asekwisaki Lazare!  *Tángá Yoa-ne 11:21-24, 38-44.*

Marta ayebaki liboso nsango malamumu oyo etali bakufi. Ayebaki ete Yehova akosekwisa bakufi mpo báfanda lisusu awa na mabele.  *Tángá Yobo 14:14, 15.*



2. Moto akómaka ndenge nini soki akufi?

Bato basalemá na putulu ya mabele. (Ebandeli 2:7; 3:19) Tozali te bilimo oyo efandaka na kati ya nzoto ya mosuni. Tozali bikelamu ya mosuni, yango wana eteni moko te ya nzoto na biso ekobaka kozala na bomoi nsima ya liwa. Soki tokufi, bɔɔngɔ na biso mpe ekufaka, mpe totikaka kokanisa. Yango wana, ntango Lazare asekwaki, alobaki te ete amonaki likambo boye to boye, mpamba te bakufi bayebaka eloko moko te.  *Tángá Nzembo 146:4; Mosakoli 9:5, 6, 10.*

Nzambe anyokolaka nde bato na mɔto nsima ya liwa? Lokola Biblia emonisi ete bakufi bayebaka eloko moko te, emonani polele ete liteya ya lifelo ya mɔto ezali ya

Nzambe alobaki na Adama boye: “Ozali putulu mpe okozonga na putulu.”

—EBANDELI 3:19.

lokuta mpe efingisaka nkombo ya Nzambe. Ayinaka ata likanisi mpamba ya konyokola bato na mto.  *Tángá Yirimia 7:31.*

3. Bato oyo bakufá bakoki kosolola na biso?

Bakufi bakoki koloba te, bakoki mpe koyoka te. (Nze-mbo 115:17) Kasi baanzelu mosusu ya mabe bakoki kosolola na bato mpe koloba na esika ya bato oyo bakufá. (2 Petro 2:4) Yehova apekisi likambo ya koluka kosolola na bakufi.  *Tángá Kolimbola Mibeko 18:10, 11.*

4. Banani bakosekwa?

Bamilio ya bato oyo bakufá bakozonga na bomoi awa na mabele. Ata bato mosusu oyo bayebaki Nzambe te mpe basalaki makambo ya mabe bakosekwisama.  *Tángá Luka 23:43; Misala 24:15.*

Bato oyo bakosekwa bakozala na likoki ya koyekola solo na ntina ya Nzambe mpe kondimela Yesu mpe kotosa ye. (Emoniseli 20:11-13) Baoyo bakozonga na bomoi mpe bakosala makambo ya malamumu, bakozala na likoki ya kozwa bomoi ya seko awa na mabele.  *Tángá Yoane 5:28, 29.*

5. Lisekwa emonisi biso nini mpo na Yehova?

Nzambe apesaki elikya mpo na bakufi na ndenge atindaki Mwana na ye akufa mpo na biso. Yango wana, lisekwa ezali komonisa biso bolingo ya Yehova mpe boboto na ye monene. Ntango bakufi bakosekwa, nani okosepela komona libosoliboso?  *Tángá Yoane 3:16; Baroma 6:23.*



Bokonzi ya Nzambe ezali nini?

1. Bokonzi ya Nzambe ezali nini?

Bokonzi ya Nzambe ezali guvèrnema ya likoló. Yango nde ekozwa esika ya baguvèrnema mosusu nyonso mpe ekosala ete mokano ya Nzambe esalema na likoló mpe awa na mabele. Nsango oyo etali Bokonzi ya Nzambe ezali nsango moko malamu. Mosika te, Bokonzi ya Nzambe ekokokisa mposa oyo bato bazalaka na yango ya kozala na guvèrnema ya malamu. Ekosala ete bato nyonso awa na mabele bázala na bomoko.  *Tángá Danyele 2:44; Matai 6:9, 10; 24:14.*

Bokonzi nyonso ezalaka na mokonzi. Yehova aponi Mwana na ye Yesu Kristo azala Mokonzi ya Bokonzi na ye.  *Tángá Emoniseli 11:15.*

2. Mpo na nini Yesu azali Mokonzi oyo abongi?

Mwana ya Nzambe azali Mokonzi oyo abongi mpamba te azali boboto, mpe akangamaka na oyo ezali malamu. (Matai 11:28-30) Mpe lisusu, azali na nguya mpenza ya kosalisa bato mpamba te akoyangela mabele atako ye afandi kuna na likoló. Nsima ya kosekwisama, Yesu amataki na likoló, mpe afandaki mpo na kozela na loboko ya mobali ya Yehova. (Baebre 10:12, 13) Nsukansuka, Nzambe apesaki ye nguya mpo abanda koyangela.  *Tángá Danyele 7:13, 14.*

Nini esali ete
Yesu azala
Mokonzi oyo
abongi?

—MARKO 1:40-42.

3. Banani bakoyangela elongo na Yesu?

Nzambe aponi etuluku moko ya bato oyo babengami “basantu” mpo na koyangela elongo na Yesu na likoló. (Danyele 7:27) Basantu ya liboso oyo baponamaki ezalaki bantoma ya sembo ya Yesu. Yehova akobaka kopona mibali mpe basi ya sembo tii na mikolo na biso mpo bázala basantu. Lokola Yesu, ba-



santu yango basekwisamaka na nzoto ya elimo. 📖 *Tángá Yoane 14:1-3; 1 Bakorinti 15:42-44.*

Bato boni bakokende likoló? Yesu abengaki bango “etonga moke.” (Luka 12:32) Nsukansuka, bango nyonso bakozala bato 144 000. Bakoyangela mabele elongo na Yesu.

📖 *Tángá Emoniseli 14:1.*

4. Nini esalemaki ntango Yesu abandaki koyangela?

Bokonzi ya Nzambe ebandaki koyangela na 1914.* Likambo ya liboso oyo Yesu asalaki ntango akómaki mokonzi ezalaki kobwaka Satana ná bademo na ye awa na mabele. Satana akómaki na nkanda makasi mpe abandaki kobimisa mpasi na mabele mobimba. (Emoniseli 12:7-10, 12) Kobanda wana, mpasi ya bato ezali kaka kobakisama. Makambo lokola bitumba, nzala, maladi, mpe koningana ya mabele ezali na kati ya “elembo” oyo emonisi ete mosika te Bokonzi yango ekozwa makambo nyonso ya mabele na maboko. 📖 *Tángá Luka 21:7, 10, 11, 31.*

5. Bokonzi ya Nzambe ezali kokokisa makambo nini?

Na nzela ya mosala ya kosakola oyo ezali kosalema na mokili mobimba, Bokonzi ya Nzambe esangisi ebele ya bato ya bikólo nyonso. Bamilio ya bato ya komikitisa bazali kondima boyangeli ya Yesu. Bokonzi ya Nzambe ekobatela bango ntango ekobebisa mokili oyo mabe. Yango wana, bato nyonso oyo balingi kozwa matomba na Bokonzi ya Nzambe basengeli koyekola kotosa Yesu. 📖 *Tángá Emoniseli 7:9, 14, 16, 17.*

Na boumeli ya mbula 1 000, Bokonzi ya Nzambe ekokokisa mokano oyo Nzambe azalaki na yango na ebandeli mpo na bato. Mabele mobimba ekokóma paradiso. Nsukansuka, Yesu akozongisa Bokonzi epai ya Tata na ye. (1 Bakorinti 15:24-26) Oyebi moto moko oyo okolinga koyebisa nsango etali Bokonzi ya Nzambe? 📖 *Tángá Nzembo 37:10, 11, 29.*

* Mpo na koyeba malamumalamu ndenge bisakweli ya Biblia elobeli mobu 1914, talá nkasa 217-220 ya buku *Makambo oyo Biblia eteyaka*.



Mpo na nini Nzambe atiki nzela na mabe mpe bampasi?



1. Mabe ebandaki ndenge nini?

Mabe ebandaki awa na mabele ntango Satana alobaki lokuta ya liboso. Na ebandeli, Satana azalaki anzelu ya kokoka, kasi “akangamaki makasi te na solo.” (Yoane 8:44) Akolisaki mposa ya kowza losambo oyo esengeli kopesama kaka na Nzambe. Satana akosaki Eva, mwasi ya liboso mpe andimisaki mwasi yango atosa ye na esika ya kotosa Nzambe. Adama alandaki mpe Eva na koboya kotosa Nzambe. Ekateli ya Adama ememaki mpasi mpe liwa.

📖 *Tángá Ebandeli 3:1-6, 19.*

Ntango Satana atindaki Eva aboya kotosa Nzambe, abandisaki botomboki mpo na kotemela boyangeli ya Nzambe. Bato mingi balandi Satana mpe baboyi ete Nzambe azala Moyangeli na bango. Na ndenge yango, Satana akómá “mokonzi ya mokili.”

📖 *Tángá Yoane 14:30; 1 Yoane 5:19.*

2. Bozalisi ya Nzambe ezalaki na mbeba?

Biloko nyonso oyo Nzambe akelá ezali ya kokoka. Bato mpe baanzelu oyo Nzambe akelaki, bazalaki na likoki ya kotosa Nzambe na makambo nyonso. (Kolimbola Mibeko 32:4, 5) Nzambe akelaki biso na bonsomi ya kopona kosala malamumu to kosala mabe. Bonsomi yango epesaka biso libaku ya komonisa ete tolingaka Nzambe. 📖 *Tángá Yakobo 1:13-15; 1 Yoane 5:3.*

3. Mpo na nini Nzambe atiki nzela na bampasi tii sikoyo?

Mpo na mwa ntango, Yehova atiki nzela ete bato bátombokela boyangeli na ye. Mpo na nini? Mpo na komonisa ete milende nyo-

Nzambe atiki bato báyangela mwa ntango molai mpo na komonisa ete bakokoka te kosilisa mikakatano ya mokili

nso oyo bato bakoki kosala mpo na komiyangela bango moko ekoki komemela bango bolamu te. (Mosakoli 7:29; 8:9) Nsima ya mbula 6 000 ya boyangeli ya bato, emonani polele ete balongi te. Biyangeli ya bato elo-

ngi te kosilisa bitumba, mobulu, kozanga bosembo, to maladi.

📖 *Tángá Yirimia 10:23; Baroma 9:17.*

Na kokesana na biyangeli ya bato, Bokonzi ya Nzambe ezali kmemela bato oyo bandimi yango matomba. (Yisaya 48:17, 18) Mo-sika te, Yehova akosukisa biyangeli nyonso ya bato. Kaka bato oyo bazali kondima boyangeli ya Nzambe nde bakofanda na mabele.

—Yisaya 11:9. 📖 *Tángá Danyeke 2:44.*

4. Motema molai ya Nzambe epesi biso libaku nini?

Satana alobaki ete moto moko te akosalela Yehova na bolingo ya solo. Okondima komonisa ete Satana alobaki lokuta? Eε, okoki komonisa yango. Motema molai ya Nzambe epesaka biso nyonso likoki ya komonisa soki tolingi boyangeli ya Nzambe to boyangeli ya bato. Lolenge oyo tozali kotambwisa bomoi na biso nde ekomo-nisa yango. 📖 *Tángá Yobo 1:8-12; Masese 27:11.*

5. Ndenge nini tokoki kopona Nzambe azala Moyangeli na biso?

Tokoki kopona Nzambe azala Moyangeli na biso soki tozali koyekola makambo oyo etali losambo ya solo mpe kopesa maboko na losambo yango, oyo eyokani na Liloba ya Nzambe, Biblia. (Yoa-ne 4:23) Tokoki komonisa ete toboi boyangeli ya Satana soki toboi kokota na makambo ya politiki mpe na bitumba, ndenge Yesu asalaki.

📖 *Tángá Yoane 17:14.*

Satana asalelaka nguya na ye mpo na kotinda bato na bomoi ya mbindo mpe na misala ya mabe. Ntango tozali koboya misala yango, baninga na biso mpe bandede na biso mosusu bakoki koseka to kotemela biso. (1 Petro 4:3, 4) Mpo na yango, tosengeli kopona. Tokozala esika moko na bato oyo balingaka Nzambe?

Tokotosa mibeko na ye ya bwanya mpe ya bolingo? Soki tosali bongo, tokomonisa ete Satana akosaki ntango alobaki ete moto moko te akotosa Nzambe soki akutani na mikakatano.

📖 *Tángá 1 Bakorinti 6:9, 10; 15:33.*

Bolingo oyo Nzambe azali na yango mpo na bato endimisi biso ete akosilisa mabe mpe bampasi. Bato oyo bamonisaka ete bandi-maka yango bakozwa bomoi ya seko awa na mabele.

📖 *Tángá Yoane 3:16.*

**Makambo oyo
toponaka
emonisaka soki
tolingi Nzambe
azala Moyangeli
na biso to te**



9

Ndenge nini libota na yo ekoki kozala na esengo?



1. Mpo na nini libala esengeli kokomisama na Leta mpo libota ezala na esengo?

Nsango malamu euti epai ya Yehova, Nzambe ya esengo, oyo alingi ete mabota ezala na esengo. (1 Timote 1:11) Ye nde abandisaki libala. Ezali na ntina ete libala ekomisama na Leta mpo libota ezala na esengo, mpamba te yango esalaka ete bana bábwkwama na esika moko oyo ekobatela bango. Bakristo basengeli kotosa mibeko ya mboka na oyo etali kokomisa libala na buku ya Leta.  *Tángá Luka 2:1, 4, 5.*

Ndenge nini Nzambe atalelaka libala? Alingaka ete mwasi ná mobali oyo babalani báfanda libela. Yehova alingi ete mobali ná mwasi bázála sembo moko epai ya mosusu. (Baebre 13:4) Ayinaka koboma libala. (Malaki 2:16) Kasi, apesi bakristo nzela ya koboma libala mpe kobala lisusu kaka soki mologani moko asali ekobo.  *Tángá Matai 19:3-6, 9.*



2. Bizaleli nini mwasi ná mobali basengeli komoniselana?

Yehova akelaki mobali ná mwasi mpo básálsanaka na libala. (Ebandeli 2:18) Lokola mobali azali mokonzi ya libota, ye nde azali na mokumba ya kokokisa bamposa ya libota na ye, ata mpe koteyaka bato ya libota na ye makambo ya Nzambe. Asengeli mpenza kolinga mwasi na ye. Mobali mpe mwasi basengeli kolinganaka mpe kopesanaka limemya. Lokola mwasi ná mobali bazali bato ya kozanga kokoka, kolimbisana nde ekosalisa bango bázála na esengo na libala.  *Tángá Baefese 4:31, 32; 5:22-25, 33; 1 Petro 3:7.*

3. Osengeli nde kokabwana na molongani na yo soki makambo ezali kosimba te?

Soki bozali na mikakatano na libala na bino, bino nyonso mibale bózála makasi mpo bósalelanaka makambo na boboto. (1 Bakorinti 13:4, 5) Liloba ya Nzambe elendisi te koka-

bwana mpo na kosilisa mikakatano oyo ebimaka na libala.
 *Tángá 1 Bakorinti 7:10-13.*

4. Bana, Nzambe alingi nini mpo na bino?

Yehova alingi ete bózala na esengo. Apesaka bino toli oyo ekoki kosalisa bino bózala na esengo na bolenge na bino. Ali-ngaka ete bózwa matomba na bwanya ya baboti na bino mpe na makambo oyo bakutaná na yango. (Bakolose 3:20) Yehova alingi mpe ete báyoka esengo oyo eutaka na kosalela Mozalisi na bino ná Mwana na ye.  *Tángá Mosakoli 11:9–12:1; Matai 19:13-15; 21:15, 16.*

5. Baboti, ndenge nini bana na bino bakoki kozala na esengo?

Bosengeli kosala nyonso mpo na koleisa bana na bino, kolatisa bango mpe kopesa bango esika ya kolala. (1 Timote 5:8) Kasi, mpo bana na bino bázala na esengo, bosengeli mpe koteya bango bálinga Nzambe mpe báyekola makambo na ye. (Baefese 6:4) Ntango bino moko bozali kolinga Nzambe, yango ekoki kotinda bana bálanda ndakisa na bino. Soki bozali kosalela Biblia mpo na koteya bana na bino, yango ekoki mpenza kobongisa makanisi na bango.  *Tángá Kolimbola Mibeko 6:4-7; Masese 22:6.*

Bana basepelaka soki bozali kolendisaka bango mpe kopesa bango longonya. Esengeli mpe kosembolaka mpe kopesaka bango disiplini. Kosala bongo esalisaka bana bálanda te nze-la oyo ekobendela bango mikakatano. (Masese 22:15) Kasi, esengeli te konyokola bana to kosalela bango makambo makasimakasi ntango ozali kopesa bango disiplini.  *Tángá Bakolose 3:21.*

Batatoli ya Yehova babimisaka babuku ndenge na ndenge mpo na kosalisa baboti mpe bana. Makanisi oyo ezali na babuku yango eutaka na Biblia.  *Tángá Nzembo 19:7, 11.*



Ndenge nini okoki koyeba lingomba ya solo?



1. Lingomba ya solo ezali kaka moko?

Yesu ateyaki bayekoli na ye lingomba kaka moko ya solo. Lingomba yango ezali lokola nzela oyo ezali komema na bomoi ya seko. Yesu alobaki boye: ‘Bato oyo bazali komona nzela yango bazali moke.’ (Matai 7:14) Nzambe andimaka kaka lingomba oyo elandaka Liloba na ye, oyo ezali solo. Basambeli nyonso ya solosolo bazali na kondima moko. *Tángá Yoane 4:23, 24; 14:6; Baefese 4:4, 5.*

“Bókeba na basakoli ya lokuta.”

—MATAI 7:15.

2. Yesu alobaki nini mpo na bakristo ya lokuta?

Yesu alobaki ete basakoli ya lokuta bakobebisa lisangá ya bokristo. Soki totaleli makambo kaka likolólikoló, ekoki komonana lokola ete bazali basambeli ya solosolo. Balobaka ete mangomba na bango ezali ya bokristo. Kasi, okoki koyeba bato ya ndenge wana na misala na bango. Ndenge nini? Kaka lingomba ya solo nde ebimisaka bakristo ya solo, oyo bayebanaka na bizaleli na bango mpe na makambo oyo basalaka. *Tángá Matai 7:13-23.*

3. Ndenge nini okoki koyeba basambeli ya solosolo?

Tótalela makambo mitano oyo elandi mpo na koyeba bango:

■ **Basambeli ya solosolo bandimaka ete Biblia ezali Liloba ya Nzambe.** Basalaka makasi ete bátosa mibeko ya Biblia na bomoi na bango. Na yango, lingomba ya solo ekeseni na mangomba oyo eteyaka makanisi ya bato. (Matai 15:7-9) Basambeli ya solosolo basalelaka makambo oyo bateyaka. *Tángá Yoane 17:17; 2 Timote 3:16, 17.*

“Balobaka polele ete bayebi Nzambe, kasi bazali kowangana ye na misala na bango.”—TITO 1:16.

■ **Bayekoli ya solosolo ya Yesu bakumisaka nkombo ya Nzambe, Yehova.** Yesu akumisaki nkombo ya Nzambe na ndenge alakisaki bato nkombo yango. Asalisaki bato báyebe Nzambe mpe ateyaki bango bábondelaka ete nkombo ya Nzambe esantisama. (Matai 6:9) Na esika oyo ofandi, lingomba nini ete yaka bato nkombo ya Nzambe?  *Tángá Yoane 17:26; Baroma 10:13, 14.*

■ **Bakristo ya solo bateyaka Bokonzi ya Nzambe.** Nzambe atindaki Yesu asakola nsango ya Bokonzi. Bokonzi ya Nzambe ezali elikya kaka moko mpo na bato. Yesu akobaki kolobela yango tii na mokolo ya liwa na ye. (Luka 4:43; 8:1; 23:42, 43) Alobaki ete bayekoli na ye bakosakola mpe Bokonzi yango. Soki moto moko ayei koyebisa yo nsango ya Bokonzi ya Nzambe, okokanisa ete azali moto ya lingomba nini?  *Tángá Matai 24:14.*

■ **Bayekoli ya Yesu bazali te bato ya mokili oyo mabe.** Okoki koyeba bango na ndenge baboyaka kokota na makambo ya politiki to na matata ya mboka. (Yoane 17:16; 18:36) Mpe lisusu, bamekolaka te bizaleli mpe misala ya mokili oyo mabe.  *Tángá Yakobo 4:4.*

■ **Bakristo ya solo balinganaka mpenza bango na bango.** Liloba ya Nzambe eteyaka bango ete esengeli komemya bato ya bikólo nyonso. Atako mbala mingi mangomba ya lokuta ekotaka na bitumba ya bikólo, basambeli ya solosolo basalaka bongote. (Mika 4:1-3) Kutu, bakristo ya solo basepelaka kosalela ntango mpe biloko na bango mpo na kosalisa mpe kolendisa basusu.  *Tángá Yoane 13:34, 35; 1 Yoane 4:20.*

4. Okoki koyeba lingomba ya solo?

Lingomba nini mateya na yango nyonso eutaka na Liloba ya Nzambe, ememyaka nkombo ya Nzambe, mpe esakolaka ete kaka Bokonzi ya Nzambe nde ekosilisa bampasi ya bato? Lingomba nini oyo bandimi na yango balinganaka mpe bakotaka na bitumba te? Okanisi nini?  *Tángá 1 Yoane 3:10-12.*



Ndenge nini mitinda ya Biblia esalisaka biso?



1. Mpo na nini tozali na mposa ya litambwisi?

Mozalisi na biso aleki biso na bwanya. Lokola azali Tata ya bolingo, amibanzabanzaka mpo na biso. Lisusu, akelá biso te mpo tómitambwisaka biso moko. (Yirimia 10:23) Kaka ndenge esengaka ete baboti bákamba mwana na bango, biso mpe tozalaka na mposa ete Nzambe atambwisa biso. (Yisa-ya 48:17, 18) Mitinda ya Biblia etambwisaka biso, mpe litambwisi yango ezali likabo ya Nzambe. *Tángá 2 Timote 3:16.*

Mibeko mpe mitinda ya Yehova eteyaka biso lolenge ya bomoi oyo eleki malamulelo oyo mpe emonisaka biso ndenge oyo tokoki kozwa likabo ya bomoi ya seko na mikolo ezali koya. Lokola Nzambe nde akelá biso, tosendeli kozala na botóndi mpo na litambwisi na ye mpe kosepela kotosa mibeko mpe mitinda na ye. *Tángá Nzembo 19:7, 11; Emoniseli 4:11.*

2. Ndenge nini mitinda ya Biblia etambwisaka biso?

Mitinda oyo ezali na Biblia ezali mateya ya ntina mingi. Mateya mosusu ya Biblia emonisaka biso nini Nzambe alingi tósala na makambo oyo tokutanaka na yango. Mibeko mosusu esalelamaka na makambo ya sikisiki. (Kolimbola Mibeko 22:8) Tosenngeli kosalela makoki na biso ya kokanisa mpo na koyeba ndenge oyo tokoki kosalela etinda moko ya Biblia na likambo moko boye. (Masese 2:10-12) Na ndakisa, Biblia eteyaka ete bomoi ezali likabo ya Nzambe. Etinda wana ya ntina mingi ekoki kotambwisa biso ntango tozali na mosala, na ndako mpe na mobembo. Yango etindaka biso tózwa bibongiseli mpo na kokima makama. *Tángá Misala 17:28.*

Ndenge nini mitinda ya Biblia esalisaka biso tózwa bibongiseli mpo na kokima makama?

—NZEMBO 36:9.

3. Mitinda nini mibale eleki ntina?

Yesu alobelaki mitinda mibale oyo eleki ntina. Etinda ya liboso emonisaka ete ntina oyo Nzambe akelá bato ezali mpo báyebe ye,

bálinga ye mpe básalela ye na bosembo. Ntango tozali kozwa bikateli, tosengeli kobosanaka te etinda wana ya liboso. (Mase-se 3:6) Bato oyo batosaka etinda wana bakómaka baninga ya Nzambe, bazwaka esengo ya solosolo mpe bakozwa bomoi ya seko. 📖 *Tángá Matai 22:36-38.*

Etinda ya mibale ekoki kosalisa biso tózala na kimya ná basusu. (1 Bakorinti 13:4-7) Kosalela etinda wana esengi kolanda ndakisa ya Nzambe na ndenge ya kosalela basusu makambo. 📖 *Tángá Matai 7:12; 22:39, 40.*

4. Ndenge nini mitinda ya Biblia esalisaka biso?

Mitinda ya Biblia eteyaka mabota ndenge oyo bolingo ekoki kosalisa bango bázala na bomoko. (Bakolose 3:12-14) Lisusu, Liloba ya Nzambe ebatelaka mabota na ndenge eteyaka bango etinda oyo: libala esengeli kouwela libela. 📖 *Tángá Ebandeli 2:24.*

Soki tozali kolanda mitinda ya Biblia ekoki kosalisa biso tózala eloko ya kolya te mpe tózala na kimya na makanisi. Na ndakisa, mbala mingi bapatre basepelaka na basali oyo batosaka mitinda ya Biblia ya kozala bato ya kolongobana mpe makasi na mosala. (Mase-se 10:4, 26; Baebre 13:18) Liloba ya Nzambe eteyaka biso mpe tósepela na biloko oyo ezali mpenza na ntina mpe boninga na biso ná Nzambe ezala na esika ya liboso koleka biloko ya mokili. 📖 *Tángá Matai 6:24, 25, 33; 1 Timote 6:8-10.*

Kosalela mitinda ya Biblia ekoki kosalisa biso tózala nzoto kolongoko. (Mase-se 14:30; 22:24, 25) Na ndakisa, kolanda mobeko ya Nzambe oyo epekisi molangwa ebatelaka biso na bamaladi mabe mpe makama. (Mase-se 23:20) Yehova apesi biso nzela tómela masanga, kasi tólekisa ndelo te. (Nzembo 104:15; 1 Bakorinti 6:10) Mitinda ya Nzambe esalisaka biso na ndenge eteyaka biso tókeba na misala na biso mpe na makanisi na biso. (Nzembo 119:97-100) Kasi, bakristo ya solo batosaka mitinda ya Nzambe te kaka mpo na matomba na bango moko. Basalaka yango mpo na kokumisa Yehova. 📖 *Tángá Matai 5:14-16.*



Ndenge nini okoki kopusana penepene na Nzambe?



1. Nzambe ayokaka mabondeli nyonso?

Nzambe azali kobenga bato ya ndenge nyonso ete bápusana penepene na ye, na nzela ya libondeli. (Nzembo 65:2) Atako bongo, ayokaka mpe andimaka mabondeli *nyonso* te. Na ndakisa, aboyaka koyoka mabondeli ya mobali oyo azali konyokola mwasi na ye. (1 Petro 3:7) Mpe lisusu, ntango Bayisraele bakobaki kosala mabe, Nzambe aboyaki koyoka mabondeli na bango. Ezali polele ete libondeli ezali libaku malamumu oyo Nzambe apesá biso. Kutu, akoki kondima ata mabondeli ya bato oyo basali masumu minene soki babongoli motema.  *Tángá Yisaya 1:15; 55:7.*

2. Tosengeli kobondela ndenge nini?

Libondeli ezali moko ya makambo ya losambo na biso, yango wana tosengeli kosambela kaka Yehova, Mozalisi na biso. (Matai 4:10; 6:9) Lisusu, lokola tozali bato ya kozanga kokoka, tosengeli kobondela na nkombo ya Yesu mpo akufaki mpo na masumu na biso. (Yoane 14:6) Yehova alingi te ete tózongelaka mabondeli oyo tokangá na motó to oyo bakomá na papye. Alingaka ete mabondeli na biso eutaka na motema.  *Tángá Matai 6:7; Bafilipi 4:6, 7.*

Mozalisi na biso akoki koyoka ata mabondeli ya nse ya motema. (1 Samwele 1:12, 13) Asengaka biso tóbondela ye na bantango nyonso, na ndakisa, ntango tolamuki na ntango to na butu ntango tolingi kolala, na ntango ya kolya mpe ntango tokutani na mikakatano.  *Tángá Nzembo 55:22; Matai 15:36.*

3. Mpo na nini bakristo bayanganaka elongo?

Kopusana penepene na Nzambe ezali petee te mpamba te tofandi ná bato oyo bandimaka Nzambe te mpe batyolaka elaka oyo apesi ya kotya kimya na mabele. (2 Timote 3:1, 4; 2 Petro 3:3, 13) Yango wana, tosengeli koyanganaka elongo



na bandeko na biso mpo na kolendisanaka.  *Tángá Baebre 10:24, 25.*

Koyangana elongo na bato oyo balingaka Nzambe esalisaka biso tópusana penepene na Nzambe. Makita ya Batatoli ya Yehova ezalaka ntango moko ya malamumu ya kolendisama na kondima ya basusu.  *Tángá Baroma 1:11, 12.*

4. Ndenge nini okoki kopusana penepene na Nzambe?

Okoki kopusana penepene na Yehova soki ozali kokanisa na makamambo oyo oyekoli na Liloba na ye. Kanisá na mateya oyo okoki kozwa na misala na ye, batoli mpe bilaka na ye. Kobonde-la mpe kokanisa na mozindo ekoki kosalisa biso tókóma na botondi mpo na bolingo mpe bwanya ya Nzambe.  *Tángá Yosua 1:8; Nzembo 1:1-3.*

Okoki kopusana penepene na Nzambe kaka soki otyeli ye motema, mpe soki ondimeli ye. Kondima ezali lokola eloko nyonso oyo esengaka báleisa yango. Okoki kokolisa kondima na yo ntango nyonso soki ozali kotalela mateya oyo ondimaka.  *Tángá Matai 4:4; Baebre 11:1, 6.*

5. Matomba nini okozwa soki opusani penepene na Nzambe?

Yehova abatelaka bato oyo balingaka ye. Abatelaka bango na makamambo nyonso oyo ekoki kobebisa kondima na bango mpe elikya na bango ya bomoi ya seko. (Nzembo 91:1, 2, 7-10) Akebisaka biso na bizaleli oyo ekoki kobebisa nzoto na biso mpe kosilisa biso esengo. Yehova ateyaka biso bizaleli oyo esalisaka biso tózala na bomoi ya malamumu mpenza.  *Tángá Nzembo 73:27, 28; Yakobo 4:4, 8.*



Nsango malamu mpo na mangomba ezali nini?



1. Mangomba nyonso ezali ya malamu?

Ezali na bato ya mitema sembo na mangomba nyonso. Nsango malamu ezali ete Nzambe amonaka bato yango mpe amibanzabanzaka mpo na bango. Kasi likambo ya mawa, makambo mingi ya mabe ezali kosalema nde na bato oyo basambelaka. (2 Bakorinti 4:3, 4; 11:13-15) Balapolo oyo bapanzi-nsango bapesaka ezali komonisa ete mangomba mosusu ezali ata kokota na makambo lokola terorisme, koboma bato ya ekólo moko mpo na kosilisa bango, bitumba, mpe kobebisa bana. Bato oyo bandimelaka Nzambe na bosome bayokaka motema mpasi na makambo ya ndenge wana! 📖 *Tángá Matai 24:3-5, 11, 12.*

Lingomba ya solo ekumisaka Nzambe, nzokande mangomba ya lokuta efangisaka nkombo na ye. Eteyaka makanisi oyo ezali na Biblia te, ata mpe mateya ya lokuta mpo na Nzambe mpe mpo na bato oyo bakufá. Kasi, Yehova alingi ete bato báyebe solo na ntina na ye. 📖 *Tángá Ezekiele 18:4; 1 Timote 2:3-5.*

2. Nsango malamu mpo na mangomba ezali nini?

Likambo ya esengo, Nzambe akosamaka te na mangomba oyo elobaka ete elingaka ye, nzokande elingaka nde mokili ya Satana. (Yakobo 4:4) Liloba ya Nzambe ebengi mangomba nyonso ya lokuta “Babilone Monene.” Babilone ezalaki engumba moko ya kala, esika losambo ya lokuta ebandaki nsima ya Mpela ya ntango ya Noa. Etikali moke, Nzambe asukisa mangomba nyonso oyo ekosaka bato mpe enyokolaka bango. 📖 *Tángá Emoniseli 17:1, 2, 5, 16, 17; 18:8.*

Ezali na bansango mosusu ya malamu. Yehova abosani te bato ya mitema sembo oyo bazali na kati ya mangomba ya lokuta na mokili mobimba. Azali koyanganisa bato yango na ndenge azali koteya bango solo. 📖 *Tángá Mika 4:2, 5.*

3. Bato ya mitema sembo basengeli kosala nini?

Yehova amibanzabanzaka mpo na bato oyo balingaka solo mpe makambo ya malamumu. Azali kosenga bango ete bálima na mangomba ya lokuta. Bato oyo balingaka Nzambe bandimaka kobongwana mpo na kosepelisa ye.  *Tángá Emonise-li 18:4.*

Na siekle ya liboso, ntango bato ya mitema sembo bayokaki nsango malamumu epai ya bantoma, bayambaki yango na esengo. Yehova ateyaki bango lolenge ya sika ya kotambwisa bomoi bango, bomoi moko ya esengo, oyo ezali na ntina mpe na elikya. Bazali ndakisa malamumu mpo na biso lelo oyo, mpaamba te bandimaki nsango malamumu mpe batyaki Yehova na esika ya liboso na bomoi na bango.  *Tángá 1 Batesaloni-ki 1:8, 9; 2:13.*

Yehova ayambaka na libota ya basambeli na ye baoyo nyonso bazali kotika mangomba ya lokuta. Soki ondimi koya epai ya Yehova ntango oyoki mongongo na ye, okokóma moninga na ye, okokota na kati ya libota ya sika ya basambeli ya Yehova oyo balinganaka, mpe okozwa bomoi ya seko.

 *Tángá Marko 10:29, 30; 2 Bakorinti 6:17, 18.*

4. Ndenge nini Nzambe akopesa bato ya bikólo nyonso esengo?

Koyeba ete etikali moke Nzambe asambisa mangomba ya lokuta ezali nsango malamumu. Yango ekosilisa minyoko nyonso na mokili mobimba. Mangomba ya lokuta ekobungisa lisusu bato nzela te mpe ekokabola bango lisusu te. Bato nyonso oyo bakozala na bomoi bakosangana na losambo ya Nzambe kaka moko ya solo.  *Tángá Emonise-li 18:20, 21; 21:3, 4.*

Lingomba ya solo
ezali kosangisa
bato



Mpo na nini Nzambe azali na ebongiseli?



1. Mpo na nini Nzambe akómisaki Bayisraele ebongiseli?

Nzambe akómisaki bato ya libota ya Abrahama ekólo moko mpe apesaki bango mibeko. Abengaki ekólo yango “Yisraele” mpe apesaki yango mokumba ya kobatela losambo ya solo mpe liloba na ye. (Nzembo 147:19, 20) Na ndenge yango, bato ya bikólo nyonso bakokaki kozwa matomba na nzela ya Yisraele. *Tángá Ebandeli 22:18.*

Nzambe aponaki Bayisraele mpo báza batatoli na ye. Lisolo ya ekólo yango emonisi ete ntango bazalaki kotosa Nzambe, bazalaki kozwa matomba na mibeko na ye. (Kolibola Mibeko 4:6) Na yango, bato mosusu bakokaki koyeba Nzambe ya solo na nzela ya Bayisraele. *Tángá Yisaya 43:10, 12.*

2. Mpo na nini bakristo ya solo babongisami?

Na nsima, Yehova Nzambe asundolaki Bayisraele mpe na esika na bango, asalaki lisangá ya bokristo. (Matai 21:43; 23:37, 38) Lelo oyo, na esika ya Bayisraele, bakristo ya solo bazali kosalela Yehova lokola batatoli na ye. *Tángá Misala 15:14, 17.*

Yesu abongisaki bayekoli na ye mpo básakola mpe bakómisa bato ya bikólo nyonso bayekoli. (Matai 10:7, 11; 24:14; 28:19, 20) Lokola nsuka ya mokili oyo ekómi pene, mosala yango ezali kosalema sikoyo na ndenge oyo esalemá naino liboso te. Mpo na mbala ya liboso, Yehova asangisi bamilio ya bato oyo bauti na bikólo nyonso na losambo ya solo. (Emoniseli 7:9, 10) Bakristo ya solo babongisami mpo na kolendisana mpe kosalisana. Na mokili mobimba, na makita na bango, bazalaka na programe moko ya mateya ya Biblia. *Tángá Baebre 10:24, 25.*

3. Ndenge nini ebongiseli ya Batatoli ya Yehova ebandaki na ntango na biso?

Na bambula 1870, mwa bato moke oyo bazalaki koyekola Biblia elongo, babandaki kososola mateya ya solo ya Biblia oyo ebombanaki banda kala. Bayaki koyeba ete Yesu abongisaki lisanga ya bokristo mpo esakola nsango malamumu. Yango wana, babandaki mosala ya kosakola nsango ya Bokonzi na mokili mobimba. Na 1931, bazwaki nkombo ya Batatoli ya Yehova.

 *Tángá Misala 1:8; 2:1, 4; 5:42.*

4. Ndenge nini ebongiseli ya Batatoli ya Yehova ezali kotambwisama lelo?

Na siekle ya liboso, masangá ya bokristo na mikili mingi ezalaki kotambwisama na lisangani ya mikóló-bakambi oyo ezalaki kondima ete Yesu azali Mokonzi ya lisanga. (Misala 16:4, 5) Ndenge moko lelo oyo, Batatoli ya Yehova na mokili mobimba batambwisami na Lisangani ya Mikóló-Bakambi, oyo esalemi na bankulutu oyo bakomeli. Lisangani yango nde etambwisaka babiro ya filiale ya Batatoli ya Yehova oyo esalaka mosala ya kobongola mikanda oyo elimbolaka Biblia na minoko koleka 600, konyata yango, mpe kokabola yango. Na ndenge yango, Lisangani ya Mikóló-Bakambi esalelaka Makomami mpo na kolendisamba mpe kotambwisa masangá koleka 100 000 na mokili mobimba. Na lisanga mokomoko, mibali oyo bakokisi masengami bakomaka bankulutu to bakengeli. Na bolingo nyonso, mibali yango babatelaka etonga ya Nzambe.  *Tángá 1 Petro 5:2, 3.*

Batatoli ya Yehova babongisami mpo na kosakola nsango malamumu mpe kokómisa bato bayekoli. Ndenge moko na bantoma, basakolaka ndako na ndako. (Misala 20:20) Tosengaka mpe bato oyo balingaka mateya ya solo mpo tóyekola Biblia elongo na bango. Kasi, Batatoli ya Yehova bazali kaka ebongiseli te. Tozali mpe libota moko, bana ya Tata moko, oyo alingaka biso. Tozali bandeko mibali mpe basi oyo batyelanaka likebi. (2 Batesaloni 1:3) Lokola Batatoli ya Yehova babongisami mpo na kosepelisa Nzambe mpe kosalisa basusu, basali libota moko oyo ezali na bato ya esengo, awa na mabele.  *Tángá Nzembo 33:12; Misala 20:35.*



Mpo na koyeba makamambo mosusu, talá mokapo 19 ya buku *Makambo oyo Biblia eteyaka*

Mpo na nini osengeli kokoba?



1. Matomba nini okozwa soki okobi koyekola Biblia?

Na ntembe te, mateya ya libosoliboso oyo oyekoli na Biblia etindi yo olinga Yehova lisusu mingi. Osengeli kokoba kosala makasi mpo bolingo yango ekita te. (1 Petro 2:2) Elikya na yo ya bomoi ya seko etaleli ndenge oyo ozali kokoba koyekola Liloba ya Nzambe mpo opusana penepene na ye.  *Tángá Yoane 17:3; Yuda 21.*

Ntango boyebi na yo mpo na Nzambe ezali kobakisama, kondima na yo mpe ekokóma makasi. Kondima ekosalisa yo osepe-lisa Nzambe. (Baebre 11:1, 6) Ekotinda yo obongola motema mpe osala mbongwana monene na bomoi na yo.  *Tángá Mi-sala 3:19.*

2. Ndenge nini boyebi ya Nzambe oyo ozwi ekoki komemela basusu matomba?

Ata soki batindi yo te, yo moko okomona ete osengeli koyebisa basusu makambo oyo oyekoli, mpamba te moto nyonso asepelaka koyebisa nsango oyo ezali malamumu. Ntango ozali kokoba koyekola Biblia, okoyeba ndenge ya kosalela yango mpo na kolo-bela kondima oyo ozali na yango epai ya Yehova mpe kosakola nsango malamumu.  *Tángá Baroma 10:13-15.*

Bato mingi babandaka liboso koyebisa nsango malamumu epai ya baninga to bandeko na bango. Salá yango na mayele. Na esika ya koloba na bango ete lingomba na bango ezali ya lokuta, yebisá bango nde makambo oyo Nzambe alaki. Lisusu, kobosana te ete bato batyaka likebi mingi nde na bizaleli ya malamumu oyo ozali komonisa kasi te na makambo oyo ozali koloba.

 *Tángá 2 Timote 2:24, 25.*

3. Boyokani ya ndenge nini okoki kozala na yango ná Nzambe?

Koyekola Liloba ya Nzambe ekosalisa yo oyeba makambo ya Nzambe mingi lisusu. Nsukansuka, okokóma na boyokani mala-

Okoki kokóma na
boyokani malamumu
mpenza ná Yehova



mu mpenza ná Yehova. Okoki kutu kokóma moto ya libota na ye. 📖 *Tángá 2 Bakorinti 6:18.*

4. Ndenge nini okoki kokoba kokende liboso?

Okoki kokende liboso na makambo ya Nzambe soki okobi koyekola Liloba na ye. (Baebre 5:13, 14) Sengá Motatoli ya Yehova moko ayekola na yo Biblia na buku *Makambo oyo Biblia eteyaka*. Ntango ozali kokoba koyekola Liloba ya Nzambe, bomoi na yo ekokóma lisusu malamumu koleka. 📖 *Tángá Nzembo 1:1-3; 73:27, 28.*

Nsango malamumu euti epai ya Yehova, Nzambe ya esengo. Okoki kopusana penepene na ye soki ozali kopusana penepene na bato na ye. (Baebre 10:24, 25) Soki okobi kosala milende mpo na kosepelisa Yehova, na ntembe te, okozwa bomoi ya solosolo, elingi koloba bomoi ya seko. Kopusana penepene na Nzambe ezali mpenza likambo eleki malamumu oyo okoki kosala!

📖 *Tángá 1 Timote 1:11; 6:19.*

Makambo oyo
Biblia eteyaka



Okoki kosenga buku
yango to kotángá
yango na Internet
na minoko ebele,
na adresi oyo
www.jw.org

LISOLO NINI
ESEPELISI YO
MINGI?

1




Nsango malamumu
ezali nini?

2




Nzambe azali
nani?

3



Nsango malamumu
eutu mpenza epai
ya Nzambe?

4



Yesu Kristo azali
nani?

5



Mokano ya Nzambe
mpo na mabele
ezali nini?

6



Elikya nini ezali mpo
na bato oyo bakufá?

7



Bokonzi ya
Nzambe ezali
nini?

8



Mpo na nini Nzambe
atiki nzela na mabe
mpe bampasi?

9




Ndenge nini libota
na yo ekoki kozala
na esengo?

10



Ndenge nini okoki
koyeba lingomba
ya solo?

11



Ndenge nini mitinda
ya Biblia esalisaka
biso?

12



Ndenge nini okoki
kopusana penepene
na Nzambe?

13



Nsango malamumu
mpo na mangomba
ezali nini?

14



Mpo na nini
Nzambe azali
na ebongiseli?

